

Noticia
Transparente
di Gobierno

ISLA ONLINE

Diabierna 31 Mei 2024

Email: IslaOnline@gobierno.aw Tel: 528-4952



ARTE DI MURAYA
SAN NICOLAS



**STABILIDAD
Y
PROSPERIDAD**

2 0 2 4



Gabinete Wever-Croes



Cu 11 voto pro y 7 contra

PARLAMENTO DI ARUBA A APROBA E LEY DI E PRIVATISACION DI RWZI

RWZI ta un di e retonan mas grandi cu Aruba tin despues di e pandemia di covid

Diahuebs 30 di mei durante un reunion publico di Parlamento di Aruba, a trata e ley di privatisacion di RWZI. E ley aki ta trata e privatisacion di e 3 RWZI (Rioolwaterzuiveringsinstallatie), Bubali, Parkietenbos y Zeewijk, y e incinerator na Parkietenbos cu awor lo bay den man di Aruba Wastewater Sustainable Solutions NV.

Cu 11 voto pro y 7 contra, Parlamento di Aruba a aproba e ley di e privatisacion di RWZI. Partidonan den oposicion AVP y MAS y Parlamentario Independiente Gerlien Croes a vota contra.

Prome Minister durante e reunion a remarca cu e problema di RWZI ta un di e retonan mas grandi cu Aruba tin despues di e pandemia di covid y e ta un problema cu ta afecta tur ciudadano di Aruba, y cu e ley aki di e privatisacion esaki lo wordo soluciona.

Minister Ursell Arends di Transporte Integridad, Naturalesa, Asunto di Adulto Mayor a compromete su mes desde cu el a forma parti di Gabinete Wever-Croes II, pa busca un solucion pa RWZI. E proceso aki no tawata facil pero e no a laga nada strob'e na caminda.

E prome paso tawata pa sondea con por yega na un solucion. A purba tur manera pa esaki keda den man di Gobierno y hasta a purba inclui e suma den e presupuesto pa inverti den e planta, pero esaki no tawata posibel. Una bes cu a explora tur opcion, y a exclui tur otro solucion, el a yega na e conclusion cu mester privatisa. Di akinan e siguiente paso tawata pa explora con pa privatisa y den man di ken.

Na e momento ey a haci un apelacion na Minister Glenbert Croes di Labor Energia y Integracion, Utilities a wordo involucra pa yuda busca un solucion pa e problema critico aki. Akinan sin duda, Minister Croes a yuda sondeando companianan estatal cu ta resorta bou di su ministerio. Sabiendo e riesgo



y responsabilidadnan cu e planta actual tin, su persona hunto cu Utilities a busca un solucion. Akinan a lanta un stuurgroep, consistiendo di representantenan di e tres ministerionan: Ministerio di Transporte, Integridad, Naturalesa y Asunto di Adulto Mayor, Ministerio di Labor, Energia y Integracion y Ministerio di Asunto General, Innovacion, Organizacion Gubernamental, Infraestructura y Planificacion Teritorial, unda DOW tawatin un papel hopi importante. Tambe DWJZ a forma parti di e stuurgroep pa locual ta trata e ley. A apunta señor Jossy Figaroa como lider di e grupo aki.

“E privatisacion di RWZI ta pa yega na un solucion pa Aruba, no pa Utilities, no pa DOW, no pa ningun minister. E solucion cu awe ta riba mesa ta pa Aruba, y tur ciudadano di e pais aki ta sclamando pa un solucion, y diahuebs nos a presenta na Parlamento e resultado final. Di curason mi kier gradici mi coleganan Minister Ursell Arends y Minister Glenbert Croes, y tur e profesionalnan cu a yuda nos pa awe nos por a yega unda nos ta. Tambe na miembronan di e stuurgroep cu a bin cu e solucion y a traha incansablemente te ora a logra. Tawata un reto grandi cu hopi obstaculo na caminda y mi ta contento cu awor nos ta asina leu”, Prome Minister a expresa. ■

Prome Minister Evelyn Wever-Croes:

GABINETE WEVER-CROES NO TA TRAHA PA SOLUCIONA E PROBLEMA PA AWOR SOLAMENTE, SINO PA FUTURO TAMBE

"Cu e planta nobo aki nos futuro generacion no mester pasa den e frustracion cu nos a pasa aden cu RWZI"



Durante su discurso den Parlamento, relaciona cu e tema pa pasa e ley di Rioolwaterzuiverings Installatie (RWZI), Prome Minister Evelyn Wever-Croes a splica cu e solucion cu Gobierno a presenta pa e planta di RWZI, ta uno pa termino largo, y na momento cu esaki wordo aproba, e compania estatal nobo lo inverti por lo menos 20 miyon florin den modernisa y digitalisa e planta.

E resultado di e inversion aki lo yuda cu e awa por wordo procesa miho, eliminando e problema grandi di holo. Tambe lo amplia e capacidad di e planta pa evita cu e awa ta pasa over, y mirando cu e calidad di e awa ta miho, lo mande pa "wetlands" pa parhanan por goza di dje atrobe, cu lo yuda na engrandece nos naturalesa. E proceso aki lo ta di gran beneficio pa Aruba, y lo pasa mesora cu Parlamento aproba pa pasa e ley di RWZI.

Prome Minister a indica cu e plan tambe ta, cu riba termino mas largo, e compania lo traha un planta nobo cu un capacidad di 16 mil meter cubico. Si compara esaki cu e planta actual cu ta 4.5 mil meter cubico, ta un diferencia grandi. E planta nobo lo

tin un capacidad di 4 biaha mas grandi.

E compromiso di Gabinete Wever-Croes ta pa traha na bienestar di e pueblo di Aruba, y e planta aki ta un problema no di awor sino di decadas atras. E holo no ta afecta solamente e comunidad di Aruba en general, sino nos bishitantenan, cu ta e pilar di nos economia. P'esey ta importante pa bin cu un solucion di inmediato, pa asina alivia e holo y crea un ambiente mas agradabel pa comunidad en general, y nos bishitantenan.

"Diahuebs 30 di mei, e ley di RWZI a wordo aproba den Parlamento. Cu e ley aki, nos no ta soluciona un problema di awe so, sino pa futuro. E planta aki no ta solamente pa nos generacion, sino tambe pa nos futuro generacion, pa nan no mester pasa den e frustracion cu nos a pasa aden. Gabinete Wever-Croes no ta traha solamente pa awor y/of pa siguiente eleccion, sino pa awor, pa mayan, y pa tur e añanan nos dilanti. Esey ta e vision di e gobierno actual aki di MEP-RAIZ", Prome Minister a expresa.

Prome Minister Evelyn Wever-Croes:

PROME MINISTER TA DESMENTI ACUSACIONNAN FALSO HACI CONTRA SU PERSONA PA PARLAMENTARIO GERLIEN CROES



Diahuebs atardi, Prome Minister Evelyn Wever-Croes tabata den Parlamento pa trata e ley di RWZI. Durante e reunion aki, y durante un entrevista pafo di Parlamento, Parlamentario Gerlien Croes a lansa acusacionnan falso contra Prome Minister y su famia, indicando cu su persona ta purbando na pasa e ley aki lo mas lihe posibel, pa asina enrikese su mes y su famia mirando cu Arulex Trust ta e representante di e compania cu lo bay tuma over e proyecto importante aki.

Prome Minister a indica cu e acusacionnan aki ta completamente falso, y cu ta un situacion bochornoso pa scucha un parlamentario hoben asina, saca tanto sushedad for di su boca, mustrando asina cu e no ta nada diferente di partido AVP sino simplemente e "verlengde".

"Mi kier a enfatisa cu e acusacionnan aki ta falso, y cu cosnan sushi asina por sali solamente di un persona cu talbes tin envidia. Mi tata ta un hende di 82 aña, y ta un homber respeta den comunidad pa locual el a haci pa Aruba y pa su carera profesional. Ya ta 2 aña cu el a baha cu pensioen, y 2 aña cu e no tin niun laso ni cu Arulex Trust Services, ni cu e bufete di abogado Croes Wever Ruiz. E nomber Croes ta keda den e nomber di bufete di abogado aki, pa respet pa tur e añanan di trabou cu mi tata a eherce. E fam Wever ta di señor Rudy

Wever den felis memoria, cu a fayece na 2007, pero pa respet a mantene e nomber aki, miarndo cu nan ta esnan cu a funda e compania aki" Prome Minister a splica.

Prome Minister a tuma su tempo pa splica e situacion actual aki cu prueba. Y mirando e hecho cu Parlamentario Croes a ripiti e palabranan aki pafo di Parlamento, Prome Minister lo cana e caminda pa Ministerio Publico pa kehe pa difamacion y cuminsa un caso di rectificacion contra su persona.

SINTONISA

CONFERENCIA DI PRENSA DI GOBIERNO DI ARUBA

Gabinete Wever-Croes

DIALUNA Y DIAHUEBS | 10:00 AM



MINISTER

Ursell Arends

ERA NOBO PA ASUNTO DI AWA SUSHI

Gobierno di Aruba a trata e ley di traspaso di e tres plantanan di RWZI (Rioolwaterverzuiverings installatie), y e incinerador na Parkientebos pa e entidad nobo, Aruba Wastewater Sustainable Solutions N.V. E paso di e ley aki ta refleha e voluntad politico y compromiso pa trece cambio sustantivo pa mehoracion den maneho di desperdicio di awa preto.

Pa mas di dos decada e problema di RWZI a bin ta tuma un stoel secundario ora ta papia di prioridad. Na momento di a forma Gabinete Wever-Croes 2, a scohe pa crea un ministerio cu lo ta encarga cu medio ambiente y naturalesa. Como parti di formacion e partidonan MEP/RAIZ a acorda tambe cu RWZI ta un asunto di prioridad pa e gabinete nobo. Nan a bay di acuerdo cu ambos partido lo atende cu e asunto aki hunto. Asina RWZI a keda formalmente parti di e cartera di Infraestructura (MEP), pero Ministerio di Naturalesa (RAIZ) lo keda directamente involvi den trece e solucion pa e situacion. A yama esaki "traha horizontal". Minister Ursell Arends cu a tuma e cartera di naturalesa a insisti desde inicio cu e impaco ambiental no ta aceptabel y a persisti ariba e urgencia pa yega na un solucion na e planta di purificacion di awa preto, RWZI. Esaki sigur ta un tema cu mas biaha Minister Arends a bai parlamento p'e.

RWZI ya pa casi 20 aña tabata un urgencia nacional pa cual motibo Minister Arends a remarca hopi biaha cu no por warda mas. Mantencion a cay atras y e planta a bira chikito pa e volumen grandi cu e mester procesa. Apesar di e estado financiero fragil di Pais Aruba, a keda busca solucion pasobra inversionnan mester wordo haci pa no solamente mantencion pero expansion. Tambe tin cu remarca cu Aruba su poblacion a crece drasticamente desde 1972 cual te aña cu a construi e planta di RWZI na Bubali.

Di e tres plantanan di RWZI, ta esun na Bubali ta carga e mayoria di e volumen di awa preto. RWZI Bubali a wordo diseña pa procesa 45000 m³ pa dia, mientras cu awo e ta ricibiendo mas cu 8000 m³ di awa pa dia, causando problema



di capacidad serio. Ciudadanonan y bishitantenan di nos pais por wak y hole e consecuencia di e esaki. Similarmente e RWZI na Parkietenbos tambe a caba di surpasa su capacidad. P'esey ora den Parlamento a puntra, ki pura Gobierno di Aruba tin pa e ley aki pasa, e contesta ta claro, pa asegura ciudadano nan salud y nos medio ambiente.

Mayoria den Parlamento a vota na favor di e ley, priorizando esaki como un iniciativa clave cu empuhe di Ministerio di Naturalesa. "Trahando den colaboracion entre ministerionan di gobierno ta haci mas eficiente pa nos adresa e asuntonan critico aki," Minister Arends a menciona. Awo cu e ley a pasa, desperdicio di awa preto por wordo procesa pa recursonan sostenibel.

Gobierno di Aruba a actua cu prudencia y e enfoca riba solucionnan pa salvaguardia nos recursonan natural. Poniendo interesnan partidista un banda y enfoca ariba e interesnan di Aruba su economia y medio ambiente. Ta importante pa remarca cu Aruba su medio ambiente tin impacto directo cu Aruba su unico pilar economico, Tursimo. Solucionando e peligro di RWZI lo tin efecto directo y positivo riba nos economia. Cu sosten di stakeholder di e sector turistico, sector priva y partnernan internacional, incluyendo finaciamento di Hulanda, Gobierno di Aruba finalmente por implementa plannan sostenibel pa soluciona e problema di RWZI. ■

MINISTER URSELL ARENDS A PRESENTA ARUBA SU INICIATIVANAN PA ENGRANDECE Y FORTIFICA SECTOR PRIMARIO NA SINT EUSTATIUS



E siman aki a tuma lugá e Dutch Caribbean Agriculture Livestock and Fisheries Alliance Conference 2024 na Sint Eustatius. Durante fin di siman Minister Arends a bishita diferente iniciativa den sector primario na Sint Eustatius como tambe Saba.

Pa marca e cuminsamento di e conferencia, gezaghebber di Sint Eustatius, Sra. Alida Francis a gradici tur cu tey presente y desvela e logo nobo pa e islanan. E logo aki a wordo diseña cu e ayudo valioso di Directora di Santa Rosa Aruba, Sra. Nathalie Maduro, y ta simbolisa e union y vision comparti di islanan di Caribe Hulandes.

Durante e conferencia Minister Arends a duna un resumen di tur e iniciativanan cu Aruba ta trahando ariba pa engrandecé y fortifica su sector primario. Minister Arends su presentacion a demostra e esfuerso cu ta wordo haci pa mehora productividad di agricultura, maneho di ganado, y pesca, cu e meta pa construi un economia mas circular y resistente pa e isla.

E Dutch Caribbean Agriculture Livestock and Fisheries Alliance Conference 2024 ta reuni stakeholdernan clave, mandatarionan, y experto di industria for di e region. E evento ta sirbi como un plataforma pa discuti strategianan, comparti miho practica, y fortalece colaboracionnan cu lo stimula e desaroyo di e sector primario den Caribe Hulandes.





DISCURSO MINISTER MADURO DI CULTURA NA OCASION DI E CELEBRACION DIA MUNDIAL DI DIVERSIDAD CULTURAL PA DIALOGO Y DESAROYO



Relaciona cu dia 21 di mei Dia Mundial di Diversidad Cultural pa dialogo y desaroyo, Departamento di Cultura hunto cu Artisa a organiza e Encuentro Multi-Cultural cu Feria Gastronomico y Show multicultural. Esaki a tuma luga dilanti Nicolaas Store na San Nicolaas. Un multitud grandi representando diferente nacion na nos Pais a asisiti na e evento pa apoya y disfruta di e cumindanan di varios pais y e show multicultural. Un total di mas di 25 presentacion di sea canto, baile, musica, poesia a presenta e cultura di cada pais.

Minister di Cultura Sra. Xiomara Maduro tabata presente y a hiba e siguiente discurso na tur esnan presente.

“Awe nos ta celebra e rikesa multicultural cu nos tin na nos Pais Aruba. Un anochi riba cual nos ta bay disfruta di un intercambio cultural di varios talentonan den forma di musica, baile y expresionnan artistico.

Mi ta contento di por mira un publico grandi na e di cuater Encuentro Multicultural pa celebra e Dia Mundial di Diversidad Cultural pa Dialogo y Desaroyo cu ta wordo observa 21 di mei.

Tabata na aña 2001 cu UNESCO a declara pa dia 21 di mei como Dia di diversidad cultural y na aña 2003 Nacionnan Uni a declara 21 di mei oficialmente como Dia Mundial di Diversidad



Cultural pa Dialogo y Desaroyo.

UNESCO y Nacionnan Uni ta confia cu si den cada pais por trece diferente cultura hunto, cu esaki ta contribui na paz, desaroyo positivo y estabilidad social den e Pais.

Cu pa medio di dialogo, comunica cu otro y inclusion, un Pais por logra biba den paz, harmonia y cu respet pa otro.

Awenochi Pais Aruba ta uni na e iniciativa di Unesco y Nacionnan Uni pa experiencia un bunita show di intercambio cultural, durante cual nos ta bay duna atencion na nos cultura y cultura di tur otro nacion cu ta biba hunto cu nos.

Nos Pais ta brinda hogar na mas cu 90 nacionalidad di mas cu 130 pais. Segun Oficina Central di Estadistica Aruba, durante e Censo na aña 2020, a constata cu 37% di e poblacion di Aruba, ta personanan di otro nacionalidad. Esaki ta demostra cu apesar cu nos ta un pais chikito, nos Pais ta cas di varios nacionalidad, di diferente cultura, tradicion, balor y custumber cu ta biba den paz y harmonia cu otro. Laga nos haci uzo di e dia aki tambe pa reflexiona riba e balornan di diversidad cultural, riba e importancia di dialogo intercultural, pa compronde y respeta cultura di otro. Fomenta igualdad, siña di otro y biba den union pa fortalece nos Pais Aruba.

Continuacion DISCURSO MINISTER MADURO DI CULTURA....

E 'Encuentro Multicultural' aki ta un bunita iniciativa pa asina por comparti rikesa di cada cultura di diferente Pais. E evento ta brinda un plataforma pa nos duna atencion na e diferente nacionnan cu ta biba aki y bini hunto y comparti cu nos comunidad nan cultura y talentonan artistico. Mi ta hopi orguyoso di tin asina tanto potencial artistico di diferente nacion cu a bin residencia na Aruba.

E fecha 21 di mei tambe ta un fecha historico pa pueblo di Aruba, ya cu riba e fecha aki 21 aña pasa, Aruba a oficialisa nos idioma materno Papiamentu. E idioma Papiamentu ta locual ta uni nos y diferente otro nacionalidad cu a bin residencia aki.

Mi ta haci uzo di e oportunidad aki tambe pa gradici un y tur cu a participa di un of otro forma, pa nan interes, esfuerso, trabou y aporte cu a ser haci pa awe nochi, pa asina nos por disfruta di un tremendo intercambio cultural.

Un palabra di gratitud na Departamento di Cultura, en especial e lider di e proyecto sr. Jhon Freddy Montoya cu ta traha incansablemente y cu hopi pasion, y tambe Artisa pa haci e evento aki posibel na San Nicolas.

Danki tambe na tur e miembronan di Cuerpo Consular na Aruba y Fundacionan cu semper ta participa pa asina por realisa e encuentro multicultural aki.

Ban Sigui fomenta inclusion y integracion, ban sigui biba na paz, den tranquilidad, cu harmonia y den union.

Na tur cu a haci Aruba nan cas, danki pa tur locual boso ta aporta cune na bienestar di nos Pais Aruba. Laga nos sigui traha den amistad y union pa fortifica nos Pais. Nos diferencia ta locual ta enrikece nos y nos respet ta locual ta uni nos.

Disfruta di e Encuentro Multicultural, un bunita forma pa comparti y experiencia cultura di tur nacion. Paso... 'Cultura bo tin cu bib'e'!"







Minister Xiomara Maduro ta informa:

ARUBA TAMBE PRESENTE NA' CREATIVE COMMONS' SU SESSIONNAN DI CULTURA HABRI Y PATRIMONIO NA PORTUGAL

Sr. Peter Scholing a haci bon uzo di e oportunidad pa brinda informacion tocante patrimonio di Aruba y Coleccion Aruba

Minister di Cultura, Xiomara Maduro ta informa como parti di e programa di TAROC (Towards a Recommendation for Open Culture), 'Creative Commons' a organiza dos dia di session pa elabora riba e topico aki na Lisbon, Portugal. Na e sessionnan aki a participa 50 experto riba varios tereno manera ley, maneho, digitalisacion, representantenan di UNESCO Paris y Wikimedia Foundation, e "Open Access Movement". Tambe a participa representantenan di comisionnan nacional pa UNESCO y hopi institucion di memoria y patrimonio. E meta tabata pa traha riba un trayecto pa yega na un recomendacion di UNESCO pa uzo y aceso liber di materialnan patrimonio cultural, mas tanto den un forma digital(isa).



E mandatario ta sigui informa cu Cultura Habri tin un papel esencial den conecta hende di diferente cultura y fomenta un ambiente di inclusion y diversidad. E ta yuda crea un comunidad global caminda hende por comparti y aprecia herencia cultural di diferente parti di mundo. E re-uso creativo di e herencia cultural ta stimula creatividad y innovacion, asina permiti pa crea productonan cultural nobo y inspirativo. E expertonan global cu a participa den e discusionnan a enfatisa e importancia di Cultura Habri pa reforsa resiliencia social y pa fomenta un ambiente di comparti conocimiento y experiencia.



Sr. Peter Scholing como un experto for di un isla chikito, investigado na Biblioteca Nacional di Aruba y actual Presidente di e Comite Regional Latinoamerica y Caribe di e Programa Memoria di Mundo (Mowlac) di Unesco tambe a wordo invita na e sessionnan. Hunto cu expertonan di di varios otro pais manera Merca, Canada, Australia, Indonesia, Maroco, Qatar, Uruguay, Mexico, Inglatera, Italia, Hulanda, Alemania y India, Aruba tambe tabatin un voz pa intercambia di opinion y discuti tocante di Cultura Habri. Durante e sessionnan aki, Sr. Scholing a haci uzo di e oportunidad pa comparti su

experiencia y brinda informacion tocante Coleccion Aruba y e trabounan cu Aruba ta haci pa conserva nos herencianan cultural haciendo uzo di tecnologia. Alabes como pionero den e region Caribe ta promove e plataforma di e herencia digital pa ta un modelo pa implementa den region por medio di cooperacion mutuo.

Minister di Cultura ta gradici Sr. Scholing pa e bon trabou cu e ta haciendo representando Aruba y tambe promoviendo e portal di herencia cultural Coleccion.aw.



CUERPO POLICIAL DI ARUBA TA WORDO FORTIFICA CU SEIS COLEGA NOBO



Diahuebs merdia, durante un momento importante y bunita, den presencia di coleganan y nan famianan, Minister di Husticia y Asuntonan Social sr. Rocco Tjon, conhuntamente cu Korpschef sr. Ramon Arnhem a huramenta seis colega nobo cu ta bay forma parti di Cuerpo Policial di Aruba.

Cuerpo Policial di Aruba ta un organisacion den desaroyo, caminda e structura di e organisacion ta bay wordo adapta y di e forma ey, brinda tur esnan cu ta traha den e organisacion aki, un carera mucho mas largo y mas miho.

Cuater persona cu a huramente ta bay yuda den e “ondersteunende processen” manera “bedrijfsvoering” y HR. E procesonan aki ta hopi importante pa por asisti esnan cu ta traha den uniformdienst of recherchedienst, pa nan por ehecuta nan trabou mucho mas miho y di e forma ey, brinda seguridad.

Locual a wordo treci padilanti ta pa recorda tur esnan cu a huramenta, pa mantene nan mes na locual nan a huramenta p’e, manera “geheimhoudingsplicht”.

Un pabien grandi na Cuevo Policial di Aruba, kende a wordo fortifica cu seis colega cu lo percura pa Cuerpo Policial por brinda un servicio aun mas miho y sigui garantisa seguridad den nos comunidad. ■■■





PUEBLO DI ARUBA TA INVITA PA BIN APOYA NOS MUCHA- Y HOBENNAN NA E APERTURA DI WEGANAN ESCOLAR 2024 DIASABRA, 1 DI JUNI

E gran apertura ta inicia 6 or di atardi na Stadion Nadi Croes y Crismo Angela



E evento deportivo ta spera pa nos mucha- y hobennan ta tuma luga diasabra awo, 1 di juni 2024. E gran apertura di Weganan Escolar 2024 ta inicia 6 or di atardi na Stadion Nadi Croes y Crismo Angela cu desfile di 45 scol, show di baile di NTG & NLG dirigi pa Marisol Peña, presentacion di Gihae Gymnastics Aruba, entretenimento di brassband y entreda di antorcha Olimpico.

E aña aki 1300 alumno di 45 scol preparatorio, basico y secundario cu a cualifica lo competi contra otro pa conquista e titulo maximo. E participantenan lo competi den diferente disciplina entre otro, beach tennis, volleyball, futbol, badminton, "kids athletics", We Baile y We Mente. Minister Endy Croes y IBiSa ta invita e comunidad di Aruba pa bin apoya nos streanan di mañan durante e competencianan di Weganan Escolar 2024.





WEGANAN ESCOLAR

GRAN APERTURA

1 DI JUNI 2024

6 PM

COMPLEHO DEPORTIVO
NADI CROES & CRISMO ANGELA

- DESFILE DI E SCOLNAN • SHOW DI BAILE
- ENTRADA DI E ANTORCHA OLIMPICO
- MASCOTA WIWI • BRASSBAND Y MUCHO MAS.



Gabinete Wever - Croes II



Ministerio di Enseñansa y Deporte





Gabinete Wever-Croes

Pa cada ciudadano di nos pais, Arte di Muraya na San Nicolas ta un recordatorio, cu hunto nos por cambia e ordinario den algo extraordinario. Laga nos admira e artenan aki cu curasonnan habri, permitiendo e beyesa di e murayanan activa nos imaginacion y inspira nos pa crea un pais mas colorido, bunita y conecta.

2024

AÑA DI STABILIDAD Y PROSPERIDAD